

MPN/MAF

RESOLUCIÓN PRESIDENCIAL

A Presidencia, no uso das facultades que lle confire a normativa vixente, á vista do informe-proposta da xefa do Servizo de Cooperación, ditou a seguinte RESOLUCIÓN:

“INFORME PROPOSTA

ANTECEDENTES

- A Deputación busca garantir un equilibrio no territorio da provincia entre o medio rural e urbano, o interior e a costa, que permita o desenvolvemento económico da totalidade do territorio e que todos os cidadáns teñan unhas óptimas condicións de vida, con independencia do seu lugar de residencia, potenciando e apoiando a prestación de servizos por parte dos concellos, como Administración máis próxima ós administrados e como motor do desenvolvemento económico-social.
- Na actualidade, Pontevedra é a provincia con máis Sendeiros Azuis recoñecidos, once en total, situados nos concellos de Baiona, Bueu, Cangas do Morrazo, A Guarda, A Illa de Arousa, Marín, Nigrán, Ponte Caldelas, e Vigo. Estes roteiros constitúen itinerarios e elementos paisaxísticos que contribúen ó uso sostible do litoral, e desempeñan unha función social importante, ó constituír excelentes lugares para o disfrute da natureza e, tamén, como elementos vertebradores para o desenvolvemento, saúde e benestar do conxunto da sociedade. Asemade, estes roteiros constitúen recursos de indubable valor que contribúen a potenciar o sector turístico da provincia, repercutindo non só nos concellos nos que discorren os roteiros, senón no conxunto da provincia.
- A Deputación de Pontevedra está interesada en promover o desenvolvemento sostenible destes roteiros das zonas litorais mediante unha xestión integrada que poñan en valor os valores naturais, históricos, culturais e etnográficos que conforman o patrimonio litoral da provincia. A colaboración cos concellos busca contribuír ó sostemento, promoción e difusión destes itinerarios co obxectivo de conformar unha ampla rede de sendeiros litorais educativos que creen un sólido nexo de unión entre concellos veciños, reforzando a cooperación entre eles, así como a consolidación da provincia como destino turístico.
- Que a Deputación de Pontevedra e o Concello de A Guarda, en virtude da vixente lexislación de réxime local pola que asumen competencias relativas a medio ambiente, promoción turística e promoción do deporte e instalacións deportivas, manifestaron o seu interese na difusión, promoción, conservación e sostemento do roteiro “SENDA LITORAL DE A GUARDA” que conta co recoñecemento como Sendeiro Azul. Ámbalas partes están comprometidas co aumento e optimización de infraestruturas e servizos que, que conservando o seu patrimonio natural, permita mellorar a calidade de vida presente e futura tanto dos seus residentes como de aqueles cidadáns que escollen este concello como destino do seu ocio.
- En data 23/06/2016 o Concello de A Guarda presenta no rexistro xeral da Deputación, unha solicitude formal para a sinatura dun convenio de colaboración co obxecto de desenvolver actuacións para a posta en valor e mellora do “SENDA LITORAL DE A GUARDA”.
- Revisada a documentación achegada, esta cumpre os requisitos esixidos pola normativa aplicable para a sinatura do convenio de colaboración.

FUNDAMENTOS XURÍDICOS

Réxime Xurídico:

- Lei 38/2003, de 17 de novembro, Xeral de Subvencións (LXS), e o seu Regulamento, aprobado por Real Decreto 887/2006, de 21 de xullo (RLXS)
- Lei 7/1985, de 2 de abril, Reguladora das Bases do Réxime Local (LRBRL)
- Lei 5/1997, de 22 de xullo, reguladora da Administración Local de Galicia (LALGA)
- Lei 30/1992, de 26 de novembro, de Réxime Xurídico das Administracións Públicas e do Procedemento Administrativo Común (LRXAP)
- Lei 9/2007, de 13 de xuño, de Subvencións de Galicia (LSG)
- Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais (ROFRJEL)
- Bases de execución do orzamento da Deputación para o exercicio 2016

Consideracións Xurídicas:

Competencia:

- 
- Artigo 36.2.b) da LRBRL, que atribúe ás deputacións a competencia para asegurar o acceso da poboación da provincia ó conxunto dos servizos mínimos de competencia municipal e encomenda ás deputacións a que dirixan a súa actividade a asegurar a prestación integral e adecuada destes servizos
 - Artigo 25.2.l) da LRBRL, que atribúelles ós concellos competencias en materia de promoción do deporte e instalacións deportivas e de ocupación do tempo libre

Petición e evacuación de informes:

- Artigos 82 e 83 da LRXAP sobre a petición e a evacuación de informes.
- Artigo 89.5 da LRXAP, que sinala que a aceptación de informes ou ditames servirá de motivación á Resolución cando se incorporen ó texto da mesma.
- Artigos 213 e ss. do TRLRFL, sobre o control e a fiscalización da xestión económica que lle corresponde realizar á Intervención.
- Bases 47ª e 48ª de execución do Orzamento provincial para 2016, sobre o control e a fiscalización da xestión económica, que sinalan a competencia da Intervención para realizar esta función.
- Artigo 24 da LXS que establece que as actividades de instrución comprenderán, entre outras, a petición de cantos informes se estime necesarios para resolver ou que sexan esixidos polas normas que regulan a subvención.

Procedencia do convenio

- Artigo 6 e seguintes da Lei 30/92, que dispón que o convenios de colaboración constitúen o instrumento adecuado para desenvolver a cooperación en cuestións de interese común.
- Artigo 57 da LRBRL que dispón que a cooperación en servizos locais desenvolverase con carácter voluntario, baixo as formas e nos termos previstos nas leis, podendo ter lugar, en todo caso, mediante convenios administrativos, en conexión co artigo 195.h) da LALGA.
- Artigo 198.3 da LALGA polo que en especial, as Deputacións Provinciais poderán subscribir, cos municipios da provincia, convenios para garantir o acceso da poboación

ó conxunto dos servizos municipais.

- Artigos 199 da LALGA, que en consonancia co artigo 6 da LRXAP tasa as especificacións que deberán conter os instrumentos de formalización dos convenios.

CONCLUSIÓN

Os Sendeiros Azuis constitúen itinerarios que ademais de contribuír á mellora do benestar e da calidade de vida dos veciños, supoñen un valor engadido ós recursos turísticos da provincia, potenciando o seu desenvolvemento económico-social. Vista a confluencia das finalidades da Deputación e Concellos nesta materia, e a contribución ó interese xeral tanto dos concellos interesados como do conxunto da provincia, convén a colaboración e actuación conxunta entre administracións. Neste sentido os convenios de colaboración constitúen o instrumento idóneo para canalizar dita colaboración.

O Concello de A Guarda amosou o seu interese na posta en valor e mellora do Sendeiro Azul "SENDA LITORAL DE A GUARDA", para o cal solicita a sinatura dun convenio de colaboración coa Deputación, achegando a documentación necesaria.

Por todo o exposto e a vista dos antecedentes e fundamentos de dereitos aplicables, **INFORMO FAVORABLEMENTE** a tramitación do convenio de colaboración co Concello de A Guarda co obxecto de levar a cabo o proxecto "ACTUACIÓNS SENDEIRO AZUL – A GUARDA".

RÉXIME COMPETENCIAL:

En virtude do establecido na base 16ª.1 das Bases de Execución do Orzamento provincial e de conformidade co disposto nos artigos 34 e 35 da LRBRL, e no artigo 17 do RLXS, a competencia para resolver atribúeselle á Presidencia.

Este informe no ten carácter vinculante, de feito que o órgano concedente co seu superior criterio decidirá.

Tendo en conta o exposto e vistos os informes da Intervención Provincial e da Secretaría Xeral, elévase á Presidencia a seguinte PROPOSTA DE RESOLUCIÓN:

- APROBAR o "CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE A GUARDA PARA LEVAR A CABO O PROXECTO "ACTUACIÓNS SENDEIRO AZUL – A GUARDA", cuxo texto literalmente transcrito dí como segue:

"CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE A GUARDA PARA LEVAR A CABO O PROXECTO "ACTUACIÓNS SENDEIRO AZUL – A GUARDA"

En Pontevedra, ____ de _____ de 2016

REUNIDOS

Dunha parte D^a María del Carmen Silva Rego, na súa condición de presidenta da Deputación Provincial de Pontevedra, actuando en virtude das competencias que lle atribúe o artigo 34.1.b) da Lei 7/1985, de 2 de abril, reguladora das bases do réxime local.

Doutra D. Antonio Lomba Baz, Alcalde-Presidente do Concello de A Guarda, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases do Réxime Local.

E actuando D. Carlos Cuadrado Romay en calidade de secretario xeral da Deputación de Pontevedra, dando fe do acto que se celebra.

As partes recoñécense con capacidade para formalizar o presente convenio, en base ós principios de colaboración, cooperación, coordinación e eficacia que deben presidir as actuacións das Administracións Públicas

EXPOÑEN

I.- Que a Deputación busca garantir un equilibrio no territorio da provincia entre o medio rural e urbano, o interior e a costa, que permita o desenvolvemento económico da totalidade do territorio e que todos os cidadáns teñan unhas óptimas condicións de vida, con independencia do seu lugar de residencia, potenciando e apoiando a prestación de servizos por parte dos concellos, como Administración máis próxima ós administrados e como motor do desenvolvemento económico-social.

II.- Que na actualidade, Pontevedra é a provincia con máis Sendeiros Azuis recoñecidos, once en total, situados nos concellos de Baiona, Bueu, Cangas do Morrazo, A Guarda, A Illa de Arousa, Marín, Nigrán, Ponte Caldelas, e Vigo. Estes roteiros constitúen itinerarios e elementos paisaxísticos que contribúen ó uso sostible do litoral, e desempeñan unha función social importante, ó constituír excelentes lugares para o disfrute da natureza e, tamén, como elementos vertebradores para o desenvolvemento, saúde e benestar do conxunto da sociedade.

A Deputación de Pontevedra está interesada en promover o desenvolvemento sostenible destes roteiros das zonas litorais mediante unha xestión integrada que poñan en valor os valores naturais, históricos, culturais e etnográficos que conforman o patrimonio litoral da provincia.

A colaboración cos concellos busca contribuír ó sostemento, promoción e difusión destes itinerarios co obxectivo de conformar unha ampla rede de sendeiros litorais educativos que creen un sólido nexo de unión entre concellos veciños, reforzando a cooperación entre eles.

III.- Que os convenios entre as Administracións Públicas constitúen o instrumento adecuado para desenvolver a súa cooperación en cuestións de interese común, tal como establecen os art. 6 e seguintes da Lei 30/1992, de 26 de novembro, de réxime xurídico das Administracións Públicas e do procedemento administrativo común, 57 da Lei 7/1985, de 2 de abril, reguladora das bases de réxime local e 198 e seguintes da Lei 5/1997, de 22 de xullo, de Administración local de Galicia.

IV.- Que a Deputación de Pontevedra e o Concello de A Guarda, en virtude da vixente lexislación de réxime local pola que asumen competencias en materia de medio ambiente, promoción turística e promoción do deporte e instalacións deportivas, manifestaron o seu interese na difusión, promoción, conservación e sostemento do roteiro "Senda Litoral De A Guarda", e que conta co recoñecemento de "Sendeiro Azul". Ámbalas partes están comprometidas co aumento e optimización de infraestruturas e servizos que, conservando o seu patrimonio natural, permita mellorar a calidade de vida presente e futura tanto dos seus residentes como de aqueles cidadáns que escollen este concello como destino do seu ocio.

V.- En base a estes antecedentes, ámbalas partes acordan a subscrición do presente convenio, consonte as seguintes:

CLÁUSULAS

Primeira.- Obxecto.

O obxecto do presente convenio é articular a colaboración entre a Deputación provincial de Pontevedra e o Concello de A Guarda para levar a cabo o proxecto "ACTUACIÓNS SENDEIRO AZUL – A GUARDA", na "Senda Litoral de A Guarda" que conta coa cualificación de "Sendeiro Azul", co alcance e no ámbito que se especifica na cláusula segunda.

Segunda.- Ámbito da colaboración.

A colaboración entre a Deputación e o Concello de A Guarda abrangue a execución do proxecto "ACTUACIÓNS SENDEIRO AZUL – A GUARDA", que implica a realización de actuacións no roteiro "Senda Litoral de A Guarda", que une as praias de Area Grande e O Muíño, en concreto a reposición e reparación do firme.

Terceira.- Importe e financiamento.

O importe ó que se refire o presente convenio estímase en dezaseis mil seiscientos sesenta e seis euros con sesenta e cinco céntimos (16.666,65 €) e comprenderá tódolos gastos de realización das actuacións incluídas no convenio.

A Deputación financiará o 80% do importe previsto, trece mil trescentos trinta e tres euros con trinta e dous céntimos (13.333,32 €), con cargo ás aplicacións correspondentes do proxecto 1610001, Sendeiros Azuis, do vixente orzamento provincial.

O Concello de A Guarda financiará o 20% restante, tres mil trescentos trinta e tres euros con trinta e tres céntimos (3.333,33 €) con cargo ó seu respectivo orzamento.

No caso de que as actuacións efectivamente realizadas teñan un custo inferior ó inicialmente previsto e sempre que isto non supoña unha execución deficiente da totalidade das actuacións, a contía do financiamento reducirase proporcionalmente entre ambas administracións.

Cuarta.- Compromisos da Deputación.

A Deputación de Pontevedra obrígase a achegar ó Concello de A Guarda o importe correspondente ó seu cofinanciamento, responsable este último, da contratación e a execución das actuacións segundo as especificacións previstas no convenio.

O pagamento pola Deputación efectuarase previa comprobación por parte dos Servizos Técnicos e a súa Intervención, de que se realizou o gasto para o fin e polo importe subvencionado, ademais de que se cumpriu coa finalidade do convenio.

O financiamento comprometido en relación o investimento licitado, atenderá ao importe definitivo derivado da xustificación dos investimentos executados, o cal terá como límite máximo o importe acordado.

Quinta.- Compromisos do Concello.

O Concello de A Guarda obrígase a:

- 1) Realizar a contratación e execución das actuacións a desenvolver previstas.
- 2) Obter as correspondentes licenzas e tramitar ante outros organismos as autorizacións pertinentes que fosen precisas.
- 3) Comunicarlle á Deputación de forma inmediata, a obtención doutras subvencións ou axudas para a mencionada finalidade procedentes de calquera administración pública ou ente privado nacional ou internacional, con expresión da súa contía

4) Darlle a adecuada publicidade ó presente convenio de colaboración, de tal xeito que quede constancia que as actuacións leváronse a cabo en colaboración coa Deputación de Pontevedra.

No prazo máximo de tres meses dende a finalización das actuacións, e en todo caso antes do 31 de marzo de 2017, o Concello queda obrigado a remitir á Deputación: conta xustificativa dos gastos, na que se determinará o custo ou gasto total da finalidade subvencionada, detallando as certificacións, facturas ou documentos con valor probatorio no ámbito mercantil e administrativo, xustificación da aplicación dos fondos á actividade subvencionada, declaración se o concello obtivo outras axudas, e unha memoria onde se xustifique o cumprimento dos obxectivos acadados e o cumprimento da obriga de difusión da colaboración da Deputación nestas actuacións.

Asemade para xustificar a realización das actuacións obxecto do convenio deberá achegar certificacións de obra, copia do contrato formalizado coa empresa adxudicataria, acta de comprobación do replanteo, así como certificado do acto de aprobación das certificacións polo órgano competente. Coa certificación final deberá achegarse acta de recepción e certificado do acordo de aprobación polo órgano competente. En todo caso as certificacións de obra serán verificadas polos servizos técnicos provinciais antes de prestar aprobación á documentación xustificativa o órgano competente da Deputación.

No caso de presentar xustificante do gasto con facturas remitirase a documentación similar que proceda.

A execución das transferencias dos importes correspondentes ás certificacións de obra executada, deberán ser realizadas no prazo máximo previsto no artigo 216 do Real Decreto legislativo 3/2011, de 14 de novembro, a contar dende a notificación por parte do Concello de A Guarda dos documentos acreditativos para a execución das transferencias.

O concello queda obrigado a prestar a colaboración e facilitar tanta documentación lle sexa requirida no exercicio das funcións de control que lle corresponden á Intervención Provincial, ó Consello de Contas e ó Tribunal de Contas; así mesmo, sométese ás actuacións de supervisión e control previstas na Lei 9/2007, do 13 de xuño, de subvencións de Galicia e as demais derivadas da normativa de axudas e subvencións.

A Deputación de Pontevedra poderá realizar as inspeccións e comprobacións que considere necesarias co fin de asegurar o cumprimento das normas e o cumprimento do obxecto do convenio de colaboración.

Sexta.- Publicidade.

Co fin de dar notoriedade ás actuacións obxecto deste convenio de colaboración, correspóndelle ó Concello de A Guarda, administración que asume a contratación e a execución das actuacións:

En todas as informacións, paneis informativos, carteis de obra ou calquera outra documentación de comunicación das actuacións ó abeiro deste convenio, incluírase de maneira visible que o financiamento das mesmas realízase conxuntamente entre as administracións asinantes deste convenio, figurando a imaxe corporativa de cada Administración.

Sétima.- Compatibilidade con outras subvencións.

As achegas económicas previstas no presente convenio serán compatibles con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou outros organismos internacionais.

Porén, o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actuación subvencionada.

Oitava.- Comisión de seguimento e control.

Para o seguimento do presente convenio de colaboración, constitúese unha comisión mixta, integrada pola Presidenta da Deputación e o Alcalde-Presidente do Concello de A Guarda, ou persoas nas que deleguen, e un funcionario de cada unha das administracións, que programará o desenvolvemento das actuacións que se reflicten na cláusula segunda.

As súas funcións, entre outras, serán as seguintes:

- *Impulsar e avaliar o cumprimento deste convenio propoñendo as actuacións que se consideren precisas.*
- *Propoñer a interpretación, no caso de dúbida, do seu contido.*
- *Se xorden controversias na aplicación do convenio propoñerlles ás partes a súa resolución.*
- *A determinación das obrigas respecto das actuacións en curso no caso de extinción por causa distinta ó cumprimento da vixencia do convenio.*

Esta comisión reunirase dentro do prazo de tres días, a contar dende a petición expresa realizada por calquera delas.

Novena.- Vixencia do convenio de colaboración.

O presente convenio de colaboración entrará en vigor na data da súa firma e terá vixencia ata o remate das actuacións previstas nel, fixándose en todo caso un prazo límite de execución ata o 31 de decembro de 2016. A vixencia do presente convenio de colaboración poderá prorrogarse coa conformidade expresa das partes.

Décima.- Resolución.

Ademais do cumprimento do prazo de vixencia, serán causas de resolución o incumprimento das obrigas derivadas deste convenio colaboración.

Undécima.- Normativa aplicable e natureza xurídica.

- *Lei 38/2003, do 17 de novembro, xeral de subvencións e o seu Regulamento aprobado por Real decreto 887/2006, do 21 de xullo*
- *Lei 9/2007, do 13 de xuño, de subvencións de Galicia*
- *Lei 7/1985, do 2 de abril, reguladora das bases de réxime local*
- *Lei 5/1997, do 22 de xullo, de Administración local de Galicia*
- *Lei 30/1992, do 26 de novembro, de réxime xurídico das administracións públicas e do procedemento administrativo común*
- *Real decreto lexislativo 3/2011, do 14 de novembro, polo que se aproba o Texto refundido da Lei de contratos do sector público*
- *Bases reguladoras da execución do orzamento da Deputación de Pontevedra para o exercicio 2016*
- *E demais normativa de obrigado cumprimento.*

O presente convenio de colaboración ten natureza administrativa, rexéndose polas estipulacións establecidas nel, as partes quedan sometidas á Xurisdición Contencioso-Administrativa, a falta de entendemento previo pola comisión citada na cláusula oitava, na resolución de posibles controversias que puideran suscitar o incumprimento ou interpretación do convenio de colaboración

E en proba de canto antecede, as partes que interveñen asinan o presente convenio de colaboración a un só efecto e por duplicado, no lugar e data salientada no seu encabezamento.

Pola Deputación de Pontevedra

María del Carmen Silva Rego

Polo Concello de A Guarda

Antonio Lomba Baz

O Secretario Xeral da Deputación

Carlos Cuadrado Romay"

- Compre lembrar ó abeiro do artigo 31.4 da Lei 38/2003, de 17 de novembro, Xeral de Subvencións, que no suposto de adquisición, construción, rehabilitación e mellora de bens inventariables, o beneficiario deberá destinar os bens ó fin concreto para o que se lle concedeu a subvención, durante un período inferior a cinco anos en caso de bens inscribibles nun rexistro público, nin a dous anos para o resto de bens*
- DARLLE TRASLADO da presente resolución ó Concello de A Guarda, á Intervención, ó Servizo de Cooperación e ó Gabinete da Presidencia.*

Pontevedra, 21 de xullo de 2016

A Xefa do Servizo de Cooperación

Marina Piñeiro Novo

Vista a precedente proposta de acordo, RESOLVO, de conformidade coa mesma.

Contra esta resolución que pon fin á vía administrativa poderá interpoñer o recurso potestativo de reposición ante o mesmo órgano que a ditou, no prazo dun mes a partir do día seguinte ó desta notificación (artigos 107 e 117 da Lei 30/1992, de 26 de novembro de Réxime Xurídico das Administracións Públicas e do Procedemento Administrativo Común, modificada pola Lei 4/1999, de 13 de xaneiro), ou ben, directamente o recurso contencioso-administrativo ante o Xulgado do Contencioso Administrativo de Pontevedra segundo o disposto no artigo 8 da Lei 29/1998, de 13 de xullo Reguladora da Xurisdición Contencioso-Administrativa, no prazo establecido no artigo 46 da citada Lei).

Todo isto sen prexuízo de que poida utilizar calquera outro recurso que estime pertinente."

O que lle traslado para o seu coñecemento, cumprimento e demais efectos.

Pontevedra, 21 de xullo de 2016

O Secretario Xeral

Por delegación a Xefa do Servizo de Cooperación

segundo R.P. núm. 2016001033, de 25 de xaneiro de 2016



Marina Piñeiro Novo

SR. ALCALDE-PRESIDENTE DO CONCELLO DE A GUARDA